

## তথ্য কমিশন

প্রত্নতত্ত্ব ভবন (৩য় তলা)  
এফ-৪/এ, আগারগাঁও প্রশাসনিক এলাকা  
শেরে বাংলা নগর, ঢাকা-১২০৭

অভিযোগ নং : ০১/২০১৪

অভিযোগকারী : জনাব মোঃ তারিকুল ইসলাম 'লিংকন'

পিতা-মোঃ আব্দুল মজিদ মিয়া  
৬২/৩/বি, দক্ষিণ মুগদাপাড়া  
ঢাকা।

প্রতিপক্ষ : জনাব নজরুল ইসলাম মিশা

জনসংযোগ কর্মকর্তা  
ও  
দায়িত্বপ্রাপ্ত কর্মকর্তা (আরটিআই)  
বি. আই. ডব্লিউ. টি. সি,  
৫, দিলকুশা, মতিঝিল, ঢাকা।

### সিদ্ধান্তপত্র।

(তারিখ : ২৭-০১-২০১৪ ইং)

আবেদনকারী জনাব মোঃ তারিকুল ইসলাম 'লিংকন' ২৫-০৮-২০১৩ ইং তারিখে তথ্য অধিকার আইন, ২০০৯ এর ৮(১) ধারা অনুসারে বি. আই. ডব্লিউ. টি. সি এর জনসংযোগ কর্মকর্তা ও দায়িত্বপ্রাপ্ত কর্মকর্তা (আরটিআই) জনাব নজরুল ইসলাম মিশা বরাবরে জি ই পি ডাকযোগে নিম্নলিখিত তথ্য জানতে চেয়ে আবেদন করেন-

চট্টগ্রাম ১ নং টার্মিনালের বেইস স্টোর মেরামত কাজের বিল প্রদানের দীর্ঘ ৪ বৎসর যাবৎ হয়রানী করা হচ্ছে। সংশ্লিষ্ট বিষয়ে সংস্থার অর্থ পরিচালক শাহিনুর ভূইয়াসহ কিছু কর্মকর্তার বিরুদ্ধে দুর্নীতি ও অনিয়মের অভিযোগ ও তদন্ত এবং বিলের বর্তমান অবস্থা সম্পর্কিত নিম্নলিখিত তথ্যঃ

- তদারকী কমিটি কাজ শেষ করার পর প্রায় ১ বৎসর কোন প্রতিবেদন প্রদান করেন নাই। সংশ্লিষ্ট বিষয়ে তার বিরুদ্ধে অভিযোগ প্রদান করা হয় এবং সংস্থা কর্তৃক একাধিক তাগিদ পত্র প্রদানের পর বাধ্য হইয়া ১টি অযৌক্তিক অবাস্তব মিথ্যা প্রতিবেদন প্রেরণ করেন যাহা পরবর্তী একাধিক তদন্তে প্রায় ১০০% মিথ্যা প্রমাণিত হয়। পরবর্তীতে কর্মচারী শাখা কর্তৃক তাহার নিকট সঠিক প্রতিবেদন প্রদানের অনুরোধ করা হয়। সেক্ষেত্রেও তিনি কোন প্রতিবেদন প্রদান করেন নাই।

প্রয়োজনীয় তথ্যঃ

কমিটির আহ্বায়কের বিরুদ্ধে কোন ব্যবস্থা গ্রহণ বা কোন জবাব আদায় করা হয়েছে কিনা?

- কমিটির আহ্বায়ক ও সদস্য প্রকৌশলী ভিন্ন রকম প্রতিবেদন প্রদান করায় সম্পাদিত কাজের চূড়ান্ত বিল প্রদান করা সম্ভব না হওয়ায় ১টি চলতি বিল প্রদান করা হয়। যাহা দায়িত্বপ্রাপ্ত পরিচালকের সুপারিশে চেয়ারম্যান মহোদয়ের অনুমোদনসহ হিসাব বিভাগে পরিশোধের জন্য প্রেরণ করা হয়। কিন্তু বিলটি চার মাস পর প্রায় ৪৫,০০০/- টাকা কর্তন করিয়া প্রদান করা হয়।

প্রয়োজনীয় তথ্যঃ

হিসাব শাখায় যাওয়ার পর ৪ মাসের সমস্ত কার্যক্রমের বিবরণ ও ৪৫,০০০/- টাকা কর্তনের কারণ।

- পরবর্তীতে দীর্ঘ দিন পর বর্তমান চেয়ারম্যান মহোদয়ের নিকট আবেদন করার পর তাহার নির্দেশে জি.এম (হিসাব) সহ ৩ সদস্যের কমিটিকে ১০দিনের মধ্যে সম্পাদিত কাজের পরিমাণ নিরূপন করার নির্দেশ করা হয়।

প্রয়োজনীয় ব্যবস্থাঃ

কত দিন পর কমিটি কি প্রতিবেদন প্রদান করেছেন? প্রতিবেদনের কপি তারিখসহ প্রদানের অনুরোধ করা হইল।

- অবশেষে দীর্ঘ দিন পর ৩,৩৯,০০০/- টাকার একটি বিল চেয়ারম্যান মহোদয়ের অনুমোদনসহ হিসাব বিভাগে পরিশোধের জন্য প্রেরণ করা হয়। প্রেরণকৃত বিল পরিশোধ না করিয়া বিলটি নীরিক্ষা বিভাগের মাধ্যমে প্রায় ২ মাসের অধিক আটক রাখিলে গত ১২-১০-২০১২ তারিখে চেয়ারম্যান বরাবর অর্থ পরিচালক এর বিরুদ্ধে দুর্নীতির অভিযোগ দাখিল করা হয়।

(অঃ পৃঃ দঃ)

প্রয়োজনীয় তথ্যঃ

(ক) ২ মাসের হিসাব বিভাগে এবং নীরিক্ষা বিভাগের কার্যক্রমের বিবরণ।

(খ) অর্থ পরিচালকের বিরুদ্ধে অভিযোগ দাখিলের আগে ও পরে নীরিক্ষা বিভাগের মতামতের বিবরণ বা নোটের কপি দাবী করা হইল।

(গ) অর্থ পরিচালকের বিরুদ্ধে অভিযোগ অনুসারে চেয়ারম্যান কর্তৃক কোন ব্যবস্থা গ্রহণ করা হয়েছে কিনা? বিবরণ দাবী করা হইল।

- নীরিক্ষা বিভাগের কিছু আপত্তির যৌক্তিকতা যাচাইয়ের জন্য সংস্থার জি.এম (মেরিন) সহ ৩ সদস্যের একটি কমিটি করা হয়। জানা যায় কমিটিকে ১০ দিন সময় দেওয়া হইলেও প্রায় ৯ মাসে কোন প্রতিবেদন প্রদান করেন নাই।

প্রয়োজনীয় তথ্যঃ

দীর্ঘ দিন প্রতিবেদন প্রদান না করায় কমিটির বিরুদ্ধে কোন ব্যবস্থা গ্রহণ করা হয়েছে কিনা অথবা কোন জবাব আদায় করা হয়েছে কিনা?

- গত ২৪-০৭-২০১৩ ইং এবং ০৩-০৮-২০১৩ ইং তারিখে চেয়ারম্যান বরাবর আবেদনে জি. এম (মেরিন) সহ কমিটি দ্বারা তদন্তের যৌক্তিক প্রতিবেদন পাওয়ার সম্ভাবনা নেইদাবী করিয়া বিকল্প ব্যবস্থায় বিলটি প্রদানের অনুরোধ করা হয়।

প্রয়োজনীয় তথ্যঃ

(ক) সর্বশেষ ২টি আবেদন অনুযায়ী কি ব্যবস্থা গ্রহণ করা হয়েছে? উভয় আবেদনের সর্বশেষ কার্যক্রমের বিস্তারিত বিবরণ দাবী করা হইল।

(খ) সর্বশেষ আবেদনের পর কমিটি কোন প্রতিবেদন প্রদান করিলে তাহার কপি দাবী করা হইল।

- আরো জানা যায় যে, এই কাজের বিষয়ে ইতিপূর্বে সংস্থার প্রধান নীরিক্ষা কর্মকর্তা ও উপমহাব্যবস্থাপক (হিসাব) এর মাধ্যমে ২টি আলাদা কমিটি দ্বারা তদন্ত করা হয়েছে।

প্রয়োজনীয় তথ্যঃ

ঐ তদন্ত ২টির প্রতিবেদনের কপি দাবী করা হইল।

০২। নির্ধারিত সময়ের মধ্যে প্রার্থীত তথ্য না পেয়ে অভিযোগকারী ০৮-১০-২০১৩ তারিখে বি. আই. ডব্লিউ. টি. সি এর চেয়ারম্যান ও আপীল কর্তৃপক্ষ (আরটিআই) জনাব মজিবর রহমান বরাবরে আপীল আবেদন করেন। আপীল আবেদন করার পরও কোন প্রতিকার না পেয়ে তিনি ০৮-১২-২০১৩ তারিখে তথ্য কমিশনে অভিযোগ দাখিল করেন।

০৩। বিষয়টি কমিশনের ০৯-০১-২০১৪ তারিখের সভায় আলোচনা করা হয়। সভার সিদ্ধান্ত অনুযায়ী অভিযোগের বিষয়ে ২৭-০১-২০১৪ তারিখ শুনানীর দিন ধার্য করে সংশ্লিষ্ট পক্ষগণের প্রতি সমন জারী করা হয়।

০৪। শুনানীর ধার্য তারিখে অভিযোগকারী জনাব মোঃ তারিকুল ইসলাম 'লিংকন'; প্রতিপক্ষ, বি. আই. ডব্লিউ. টি. সি এর জনসংযোগ কর্মকর্তা ও দায়িত্বপ্রাপ্ত কর্মকর্তা (আরটিআই) জনাব নজরুল ইসলাম মিশা হাজির। অভিযোগকারী তার বক্তব্যে উল্লেখ করেন যে, তথ্য অধিকার আইন, ২০০৯ অনুযায়ী দায়িত্বপ্রাপ্ত কর্মকর্তা (আরটিআই) এর নিকট ০১ নং অনুচ্ছেদে উল্লিখিত তথ্য চেয়ে আবেদন করেন। তথ্য না পেয়ে তিনি আপীল কর্তৃপক্ষ (আরটিআই) বরাবরে আপীল আবেদন করেন। আপীল আবেদন করার পরও কোন প্রতিকার না পেয়ে তথ্য কমিশনে অভিযোগ দাখিল করেন।

০৫। বি. আই. ডব্লিউ. টি. সি এর জনসংযোগ কর্মকর্তা ও দায়িত্বপ্রাপ্ত কর্মকর্তা (আরটিআই) তার বক্তব্যে উল্লেখ করেন যে, অভিযোগকারীর প্রার্থীত তথ্য গোপনীয় বিধায় এবং উর্ধ্বতন কর্তৃপক্ষের অনুমতি ছাড়া সরবরাহ করা সম্ভব হয়নি।

০৬। অভিযোগকারীর প্রার্থীত তথ্যাদি তথ্য অধিকার আইন, ২০০৯ অনুযায়ী কোন গোপনীয় তথ্য নয় বলে কমিশন মতামত প্রদান করেন। কমিশনের মতামতের প্রেক্ষিতে দায়িত্বপ্রাপ্ত কর্মকর্তা (আরটিআই) অভিযোগকারীর প্রার্থীত তথ্য সরবরাহে নিশ্চয়তা প্রদান করেন।

## পর্যালোচনা।

অভিযোগকারী ও দায়িত্বপ্রাপ্ত কর্মকর্তা (আরটিআই) উভয়ের বক্তব্য শ্রবনান্তে, দাখিলকৃত প্রমাণাদি পর্যালোচনান্তে পরিলক্ষিত হয় যে, দায়িত্বপ্রাপ্ত কর্মকর্তা (আরটিআই) অভিযোগকারীর প্রার্থিত তথ্য গোপনীয় তথ্য বিবেচনায় সরবরাহ করেননি কিন্তু তথ্য অধিকার আইন, ২০০৯ অনুযায়ী অভিযোগকারীর প্রার্থিত তথ্যাদি কোন গোপনীয় তথ্য নয়। দায়িত্বপ্রাপ্ত কর্মকর্তা (আরটিআই) অভিযোগকারীর প্রার্থিত তথ্য কমিশনের নির্দেশনা অনুযায়ী সরবরাহের নিশ্চয়তা প্রদান করায় অভিযোগটি নিষ্পত্তিযোগ্য মর্মে গণ্য করা যায়।

## সিদ্ধান্ত।

বিস্তারিত পর্যালোচনান্তে নিম্নলিখিত নির্দেশনা প্রদানপূর্বক অভিযোগটি নিষ্পত্তি করা হলো :-

- ১। তথ্যের মূল্য পরিশোধ সাপেক্ষে আগামী ০৪-০২-২০১৪ তারিখ বা তদপূর্বে অভিযোগকারীকে তার প্রার্থিত তথ্য সরবরাহ করার জন্য বি. আই. ডব্লিউ. টি. সি এর জনসংযোগ কর্মকর্তা ও দায়িত্বপ্রাপ্ত কর্মকর্তা (আরটিআই) কে নির্দেশনা দেয়া হলো।
- ২। তথ্য অধিকার আইন, ২০০৯ এর ধারা-৯ এবং তথ্য অধিকার (তথ্য প্রাপ্তি সংক্রান্ত) বিধিমালা, ২০০৯ এর বিধি-৮ অনুযায়ী সরবরাহকৃত তথ্যের মূল্য বাবদ আদায়কৃত অর্থ ১-৩৩০১-০০০১-১৮০৭ নং কোডে সরকারী কোষাগারে জমা প্রদানের জন্য দায়িত্বপ্রাপ্ত কর্মকর্তা (আরটিআই) কে নির্দেশ দেয়া হলো।
- ৩। নির্দেশনাগুলো বাস্তবায়ন/প্রতিপালন করে তথ্য কমিশনকে অবহিত করার জন্য উভয়পক্ষকে বলা হলো।

সংশ্লিষ্ট পক্ষগণকে অনুলিপি প্রেরণ করা হোক।

স্বাক্ষরিত  
(অধ্যাপক ড. সাদেকা হালিম)  
তথ্য কমিশনার

স্বাক্ষরিত  
(মোহাম্মদ আবু তাহের)  
তথ্য কমিশনার

স্বাক্ষরিত  
(মোহাম্মদ ফারুক)  
প্রধান তথ্য কমিশনার